



Commentari

La Val Müstair perda il label Unesco sco reservat da biosfera

David Spinnler, correspondent RTR Engiadina

Radio rumantsch

S-chanf di na – Zernez di na – duas decisiuns che fan mal

14-06-2015

Ma na – quest n'è betg in commentari dad in Jauer che abita en Val Müstair e na vul ussa betg acceptar ils resultats democratics dals duas vischins engiadinais. Na – jau accept senz'auter ils resultats e met mes cor en pasch. Jau nu sun dentant betg mo Jauer – jau sun era Engiadinais – pervia che la regiun Engiadina, Samignun, Parc Naziunal e Val Müstair – è quai che quinta per l'avegnir – era economicamain per ils abitants.

E qua ves jau be segns da dumonda: Co po questa regiun regalar in label Unesco? – Regalar è forsa il fauss plaid – ins stuess dir: bittar davent! Tge senn fa quai per ina regiun che viva dal turissem? Pertge dian duas vischnancas ch'èn vischnancas dal Parc Naziunal na ad in label da l'Unesco per in reservat da biosfera nua che il Parc Naziunal è cumprais sco minz? Jau na chapesch betg – cun tut las stentas da chattar ils arguments.

Che la tema dad eventualmain perder en in lieu in pau libertad pervia dad in contract per ina zona da tgira – che questa tema quinta dapli sco in label che tut la regiun avess pudì trair a niz per esser precis quella che turists da tut al mund ston visitar – jau na ves betg l'argument. Jau na chapesch era betg che il Parc naziunal di ussa – suenter il na da Zernez ed il na da S-chanf – che al label Unesco per il Reservat da biosfera Val Müstair Parc Naziunal fiss be stà «nice to have». Surpresa damai – che il Parc Naziunal gnanc na voleva betg cun persvasiun il label Unesco per la Biosfera.

Ed a propos Val Müstair: uss èsi 5 suenter las 12. Uss sto la Biosfera persvader spert sco parc da natira ed emblidar il label da l'Unesco. Ins sto esser almain uschè bun sco bod 30 auters parcs. Uschiglio pon ins cumenzar da studegiar en Val Müstair tgi ch'è anc là sco ultim per stizzar la glisch.